

四庫全書

集部

欽定四庫全書

文章辨體彙選卷五百六十四

明 賀復徵 編

記五 祠堂

徐孺子祠堂記 宋曾鞏

漢元興以後政出宦者小人挾其威福相煽為惡中材  
顧望不知所為漢既失其操柄紀綱大壞然在位公卿  
大夫多豪傑特起之士相與發憤同心直道正言分別

是非白黑不少屈其意至於不容而織羅鉤黨之獄起其執彌堅而其行彌勵志雖不就而忠有餘故及其既歿而漢亦以亡當是之時天下聞其風慕其義者人人感慨奮激至於解印綬棄家族骨肉相勉赴死而不避百餘年間擅強大覲非望者相屬皆逡巡而不敢發漢能以亡為存蓋其力也孺子於時豫章太守陳蕃太尉黃瓊辟皆不就舉有道拜太原太守安車備禮召皆不至蓋忘已以為人與獨善於隱約其操雖殊其志於仁

一也在位士大夫抗其節於亂世不以死生動其心異於懷祿之臣遠矣然而不屑去者義在於濟物故也孺子嘗謂郭林宗曰大木將顛非一繩所維何為棲棲不遑寧處此其意亦非自足於邱壑遺世而不顧者也孔子曰顏回用之則行舍之則藏惟我與爾有是夫孟子亦稱孔子可以進則進可以止則止乃所願則學孔子而易於君子小人消長進退擇所宜處未嘗不惟其時則見其不可而止此孺子之所以未能以此而易彼也

孺子姓徐名穉子其字也豫章南昌人按圖記章水北遶南昌城西歷白社其西有孺子墓又北歷南塘其東為東湖湖南小洲上有孺子宅號孺子臺吳嘉禾中太守徐熙於孺子墓隧種松太守謝景於墓側立碑晉永安中太守夏侯嵩於碑旁立思賢亭世世修治至拓跋魏時謂之聘君亭今亭尚存而湖南小洲世不知其嘗為孺子宅又嘗為臺也予為太守之明年始即其處結茅為堂圖孺子像祠以中牢率州之賓屬拜焉漢至

今且千歲富貴湮滅者不可稱數孺子不出閭巷獨稱  
思至今則世之欲以智力取勝者非惑歟孺子墓失其  
地而臺幸可考而知祠之所以示邦人以尚德故并采  
其出處之意為記焉

撫州顏魯公祠堂記

曾鞏

贈司徒魯郡顏公諱真卿事唐為太子太師與其從父  
兄杲卿皆有大節以死至今雖小夫婦人皆知公之為  
烈也初公以忤楊國忠斥為平原太守知安祿山必反

為之備祿山既舉兵公與常山太守杲卿伐其後賊之不能直闕潼關以公與杲卿撓其勢也在肅宗時數正言宰相不悅斥去之又為御史唐旻所搆連輒斥李輔國遷太上皇居西宮公首率百官請問起居又輒斥代宗時與元載爭論是非載欲有所壅蔽公極論之又輒斥楊炎盧杞既相德宗益惡公所為連斥之猶不滿意李希烈陷汝州杞即以公使希烈希烈初慚其言後卒縊公以死是時公年七十有七矣天寶之際久不見兵

祿山既反天下莫不震動公獨以區區平原遂折其鋒  
四方聞之爭奮而起唐卒以振者公為之倡也當公之  
開土門同日歸公者十七郡得兵二十餘萬由此觀之  
苟順且誠天下歸之矣自此至公歿垂三十年小人繼  
續任政天下日入於弊大盜繼起天子輒出避之唐之  
在朝臣多畏怯觀望能居其間一忤於世失所而不自  
悔者寡矣至於再三忤於世失所而不自悔者蓋未有  
也若至于起且仆以至於七八遂死而不自悔者則天



下一人而已若公是也公之學問文章往往雜於神仙  
浮圖之說不皆合於理及其奮然自立能至於此者蓋  
天性然也故公之能處其死不足以觀公之大何則及  
至於勢窮義有不得不死雖中人可勉焉況公之自信  
也歟惟歷忤大姦顛跌撼頓至於七八而始終不以死  
生禍福為秋毫顧慮非篤於道不能如此此足以觀公  
之大也夫世之治亂不同而士之去就亦異若伯夷之  
清伊尹之任孔子之時彼各有義夫既比於古之任者

矣乃欲瞻顧回隱以市於世其可乎故孔子惡鄙夫不  
可以事君而多殺身以成仁者若公非孔子所謂仁者  
歟今天子至和三年尚書都官郎中知撫州聶君厚載  
尚書屯田員外郎通判撫州林君慥相與慕公之烈以  
公之嘗為此邦也遂為堂而祀之既成二公過予之家  
而告之曰願有述夫公之赫赫不可蓋者固不繫於祠  
之有無蓋人之嚮往之不足者非祠則無以致其志也  
聞其烈足以感人况拜其祠而親炙之者歟今州縣之

政非法令所及者世不復議二君獨能追公之節尊而事之以風示當世為法令之所不及是可謂有志者矣

宋文丞相祠堂記

明羅倫

為臣死忠為子死孝一也可以動天地可以感鬼神可以貫日月可以孚木石可以正萬世之人心立萬世之天常孟子曰我善養吾浩然之氣以塞乎天地之間夫殺身成仁舍生取義非浩然塞乎天地之間者能與於斯乎若宋丞相信國文公是已公名天祥甫弱冠奉廷

對陳君道之大本經世之急務文思神發萬言立就可  
謂天下之大才矣董宋臣主和議公上章乞斬之呂師  
元偃蹇傲命公又上章乞斬之賈似道誤國要君公當  
制以義裁之勤王詔下重臣宿將縮頸駭汗公提孤兵  
獨往當之元次臯亭三宮震動宰相遯荒挺身獨往就  
之可謂天下之大勇矣夫慷慨就義決死生於一旦中  
人猶或能之若歷履萬死其執彌堅其志彌厲非仁者  
其能乎方公之使元詆酋大罵逆賊當死脫京口走真

州如揚州趨高郵抵太通州苗再成逐之李庭芝疑之外迫於彊敵內煎於饑饉無日而不當死然後遵海道涉鯨波歸立二主開督南劍敗績於空坑仰藥於潮陽絕粒於南安當死歷萬死而不死卒之就囚燕獄從容南向而後死震動天地照耀萬世可謂天下之大忠矣夫公之忠誠能墮空山之石能通七里之神能作廣陵之風雨能起絕地遐荒之敬悚而不能免賈似道之沮黃萬石之疾李庭芝之疑陳宜中張世傑之忌何也蘓

子曰其所能者天也其不能者人也其斯之謂歟宋之  
亡也死國者多矣陸秀夫張世傑死於海李希死於潭  
趙昂發死於池姚訐死於常趙世賞死於洪先君武岡  
公開禮死於吉安公制服哭祭之督府行朝死者不可  
勝數雖然死矣未有如公之出萬死而後死也微子之  
去箕子之囚龍逢比干之諫伯夷叔齊之餓諸葛武侯  
之鞠躬盡瘁備於公一身矣自古亡國之臣未有如公  
之烈也收宋三百年養士之功立千萬載為臣之極不

在於公乎非仁者之勇浩然而塞乎天地之間者乎公  
去今二百年順天祠公於學宮鄉郡祠公於城南公之  
子孫祠公於富田富田之祠元季兵變為橫民所奪龍  
鳳間僉事李公飲水復之正統間知府陳公本深繼之  
景泰間都憲韓公雍奏加謚號錄用子孫今上成化二  
年僉憲李公齡來掌學士以公九世孫繼宗入學俾公  
鄉人周丕憲割田贍之是皆有功於名教可書故書之  
以詔萬世之為人臣者

歲享旌忠廟碑記

楊慎

旌忠廟祀後唐節度使夏公也公諱魯奇守武信日董  
璋反東川攻遂州公在圍城中兵食盡而援不至遂自  
剄死公結髮從軍事莊宗早立謹於天下驅馳中原破  
勁燕潰驍魏王彥章號千人敵竟成擒於公手及其守  
一隅孤城反受困於僮豎豈非天哉傳曰善死者不亡  
公善死矣以身殉城以死勤事忠憤之氣凜然千載宜  
其赫爲明神廟食一方也歐陽公修五代史以死事傳



之五代之臣在是列者僅十人耳國朝敦重祀典非功烈昭映史冊者不與大明會典所載全蜀合祀之廟七而旌忠廟在焉豈陳寶之光景動人畏壘之私相尸祝班乎土人每歲孟夏五日遠近相率虔以承祀祀儀雜用社蜡顧未有迎享送神辭縣人士以為請乃衍楚辭國殤之義摛諸聲刻諸麗牲石用薦歲嘗焉其辭曰

炳管蕭兮挹椒醕承盱蠻兮闔神宇神之靈兮毅且雄精為星兮氣為虹著光景兮如在標晴霞兮彤彤神之

來兮霄曖舒披颿爽兮英風噓紛羽存兮揚鳥旗置霜  
稍兮縶雲駒淵淵兮撻鼓噉噉兮陳竽歌振縷兮舞回  
裾神醉止兮奄虞虞神之去兮靈澤下雨霑俎兮霧蒙  
葦留我祺兮蕃我禧驅伯強兮逐肥鱣畝栖粟兮箔委  
絲留蕩滌兮休德流滋恢台孟夏兮歲以為期拜神貺  
兮神無射思斗城金壁兮奠我邦土我民敬薦兮無絕  
終古

文章辨體彙選卷五百六十四

欽定四庫全書

文章辨體彙選卷五百六十五

明 賀復徵 編

記六 遠愛

興州水運記 唐柳宗元

御史大夫嚴公牧于梁五年嗣天子用周漢進律增秩  
之典以親諸侯謂公有功德理行就加禮部尚書是年  
四月使中謁者來錫公命賓僚吏屬將校卒士鰲老童

孺填溢公門舞躍歡呼願建碑紀德垂億萬祀公固不許而相與怨咨遑遑如不飲食於是西鄙之人密以刊山導江之事願刻巖石曰維梁之西其蔽曰某山其守曰興州興州之西為戎居歲備亭障實以精卒以道之險隘兵困於食守用不固公患之曰吾嘗為興州凡其土人之故吾能知之自長舉北至於青泥山又西抵於成州過粟亭川踰寶井堡崖谷峻隘十里百折負重而上若蹈利刃盛秋水潦窮冬雨雪深泥積水相輔為害

顛踣騰藉血流棧道糗糧芻藁填谷委山牛馬羣畜相  
藉物故餽夫畢力守卒延頸嗷嗷之聲其可哀也若是  
者綿三百里而餘自長舉而西可以導江而下二百里  
而至昔之人莫得知也吾受命於君而育斯人其可已  
乎乃出軍府之幣以備器用即山僦功由是轉巨石仆  
大木焚以炎火沃以食醢摧其堅剛化為灰燼舂錡之  
下易甚朽壤乃闢乃壑乃宣乃理隨山之曲直以休人  
力順地之高下以殺湍悍厥功既成咸如其素於是決

去壅土疏導江濤萬夫呼拊莫不如志雷騰雲奔百里  
一瞬既會既遠淡為安流烝徒謳歌枕卧而至戍人無  
虞專力待寇惟我公之功疇可侔也而無以酬德致其  
大願又不可得命矧公之始來屬當惡歲府庾甚虛器  
備甚殫饑饉昏札死徙充路賴公節用愛人克安而生  
老窮有養幼乳以遂不問不使咸得其志公命鼓鑄庫  
有利兵公命屯田師有餘糧選徒練旅有衆孔武平刑  
議獄有衆不黷增石為防膏我稻梁歲無凶灾家有積

倉傳館是飾旅忘其歸杠梁以成人不履危若是者皆以戎隙帥士而為之不出四人之力而百役已就且我西鄙之職官故不能具舉惟公和恒直方廉毅信讓敦尚儒學抑損貴位率忠與仁以厚其誠有可以安利於人者行之堅勇不俟終日其興功濟物宜如此其大也昔之為國者惟水事為重故有障大澤勤其官而受封國者矣西門遺利史起興歎白圭壑隣孟子不與公能夷險休勞以惠萬代其功烈尤章章焉不可蓋也是用



假辭謁工勒而存之用永憲於後世

零陵郡復乳穴記

柳宗元

石鐘乳餌之最良者也楚越之山多產焉於連於韶者獨名於世連之人告盡焉者五載矣以貢則買諸它部今刺史崔公至逾月穴人來以乳復告邦人悅是祥也雜然謠曰毗之熙熙崔公之來公化所徹土石蒙烈以爲不信起視乳穴穴人笑之曰是惡知所謂祥耶嚮吾以刺史之貪戾嗜利徒吾役而不吾貸也吾是以病而

紿焉今吾刺史令明而志潔先賴而後力欺誣屏息信  
順休洽吾以是誠告焉且夫乳穴必在深山窮林冰雪  
之所儲豺虎之所廬由而入者觸昏霧扞龍蛇束火以  
知其物縻繩以誌其迆其勤若是出又不得吾直吾用  
是安得不以盡告今而乃誠吾告故也何祥之為士聞  
之曰謠者之祥也乃其所謂怪者也笑者之非祥也乃  
其所謂真祥者也君子之祥也以政不以怪誠乎物而  
信乎道人樂用命熙熙然以效其有斯其為政也而獨

非祥也歟

尹公亭記

宋曾鞏

君子之於已自得而已矣非有待於外也然而曰疾沒世而民不稱焉者所以與人同其好也人之於君子潛心而已矣非有待於外也然而有表其間名其鄉欲其風聲氣烈暴於世之耳目而無窮者所以與人同其好也內有以得諸已外有以與人同其好此所以為先聖之道而異乎百家之說也隨為州去京師遠其地僻絕

慶歷之間起居舍人直龍圖閣河南尹公洙以不為有  
勢者所容謫是州居於城東五里開元佛寺之金燈院  
尹公有行義文學長於辯論一時與之遊者皆世之間  
人而人人自以為不能及於是時尹公之名震天下而  
其所學益不以貧富貴賤死生動其心故其居於隨日  
考圖書通古今為事而不知其官之為謫也嘗於其居  
之北阜竹柏之間結茅為亭以芟為嬉歲餘乃去既去  
而人不忍廢壞輒理之因名之曰尹公之亭州從事謝

景平刻石記其事至治平四年司農少卿贊皇李公禹卿為是州始因其故基增庠益狹斬材以易之陶瓦以覆之既成而寬深亢爽環隨之山皆在几席又以其舊亭峙之於北於是隨人皆喜慰其思而又獲遊觀之美其冬李公以圖走京師屬予記之蓋尹公之行見於事言見於書者固以赫然動人而李公於是又侈而大之者豈獨慰隨人之思於一時而與之共其樂哉亦將使夫荒遐僻絕之境至於後人見聞之所不及而傳其名

覽其跡者莫不低徊俯仰想尹公之風聲氣烈至於愈遠而彌新是可謂與人同其好也則李公之傳於世亦豈有已乎故予為之書時熙寧元年正月日也

宣慰曾侯嘉政記

明宋濂

自中原倂擾蔓延大江之東兵連不解殆將十稔今年春三月丙辰西睦州陷夏四月壬午江浙行中書左丞楊公以浦陽與睦州鄰也命宣慰曾侯自杭率師來鎮其地五月乙巳師還邦人德其善馭士卒而弗擾也思之

不置縣達嚕嚕齊碩裕實巴哈君暨婺州路同知趙君  
大訥因民之思而相與樹碑於縣庭謂濂頗從事於文  
墨走書來徵記曰浦陽婺之最爾邑環以大山長嶺舟  
車所不通往歲大將趙野遜台首統軍道其間以輜重  
弗解羽而飛也塗逢農賈及浮屠黃冠師不問能不能  
以徽纏繫頸使肩之或血流不止出即殺以徇民深患  
苦或傳有師至咸驚呼曰吾屬將焉免夫亟奔避山谷  
至閔旬不返曾侯嘗知民情之驚疑從間道疾驅至縣

申飭紀律區分隊伍各從方部以奠其居非有令號不敢妄踰戶限仍令勇卒守其四門敢出入者罪隨加焉夜漏既下乃被鐵衣持弓矢從一二騎周巡近郊威加氣讐莫敢少恣一旦門者稍怠有竊出捕人魚者痛鞭其長懲之自是無一人敢違命者縣父老相與言曰曾將軍其來矣乎何為使我民不知也將軍其愛我也夫又指所統兵而相謂曰彼大纓短製而腰刀者其溪峒之軍也夫吾儕小人無所識知頗聞此軍勇鷙游擊未



易服馴又何其帖帖如是乎脫使他大將如曾將軍我  
民何至暴露山谷乎咸咨嗟慕咏而去居亡何左丞公  
自將臨睦州檄曾侯還杭以守舊營晚始受命雞初號  
復就間道馳去每出卒一隊輒用數騎士監之若魚貫  
若鴈行無敢亂越三日縣父老又相與言曰曾將軍其  
去矣乎何為來不吾知而去亦不吾知也揆於古之良  
將善馭師者其亦無愧也乎人有功而人忘之不祥達  
魯花赤君縣之賢大夫趙郡丞鄉之達尊曷有以處吾

屬乎我等聞其言弗忍違用以其事累吾子幸有以詳  
文之濂發書為之歎曰有是哉何曾侯之賢於人也易  
曰師出以律否臧凶若如所言其殆師出以律者歟師  
出以律者吾見亦罕矣嗚呼有是哉何曾侯之賢於人  
也濂雖不識曾侯竊聞所至以愛民為務今來浦陽會  
大府有驗畝徵糧之事為之惻然亟白部使者罷之則  
其及物之功又不特善馭士卒使弗擾而已也濂因弗  
敢辭為文其事於石然而石可泐也文可滅也曾侯之

功簡在縣民之心者千百載猶一日也曾侯尚勉之哉  
它時登宥府居政路其位益顯其功當益溥又將有鴻  
生峻儒執筆而特書之曾侯名華字粦叟武岡人精悍  
而有智謀通孫吳司馬法損家貲招兵市馬為國宣力  
前後屢建大勛今以明威將軍廣東道宣慰副使僉都  
元帥府事兼江浙行省都鎮撫其裨將天臨李君敞精  
於騎射贊佐之間多著勞烈亦法之所宜書者也至正  
十八年夏五月二十一日記

遺愛祠記

唐龍

景泰初漕政弗葺乃度江淮之鎮建都御史行臺以總攝其綱而首畀諸河洲王公竑尋兼領撫事凡茲江北列郡諸州咸撫有焉嘉靖戊子春二月予小子竊辱是命惟夙夜凜焉而懼弗勝既至境上揖諸子大夫曰斲木者引繩則直立政者同道則治是故周公治東郊克慎厥始君陳克和厥中畢公善成之以休於前政以建無窮之基予小子俚俚然而無所從也自有都臺百年

於斯執簡者孰賢子大夫曰皆賢曰孰可法曰皆可法  
河洲王公其至哉詢於父老猶夫子大夫之言子弟相  
率以告與父老無以異也夫公為給事時孚號朝列奮  
擊權臣既為都御史董帥三軍鞭驅虜衆是有社稷之  
功矣而於是也何有乃博采州郡志及讀公神道碑益  
知公嚴毅堅直政務酌於民心廉境內豪右而訖其法  
尤嫉貪墨吏曰是民賊也踣而繫之威令號號然如雷  
霆之不可褻侮徐淮歲大祲百姓饑餓山東河南二路

流民又猝至公先發漕米一百六十餘萬石近者計日  
鋪以粥遠者料量其斗斛而均布之轉徙者路食之長  
活凡三十萬一千人病者給之醫藥又活一千四百人  
被鬻者贖還其家一千二百四十四死者殮而葬之三  
千三百餘人夫周近遠庇死生療病而還鬻公可謂無  
所不用其至矣比公被誣逮繫者至易衣一襲買小舟以  
行民如失慈母攀號而送之天順間公再蒞民又如得  
慈母老人偃僂丁壯踴躍童子歌謠而來見公連屬三

日不絕法以防民仁以養之是故威行而愛立予小子  
皇皇焉思所休於公之政而未之能然亦不敢惰也既  
弟子員上書曰封南國之棠者思召伯之政泣峴山之  
碑者追叔子之德公寔懷柔我土其有以繫民之思可  
也先是西湖之濱有浮屠氏宮官司撤其土像麾散其  
徒若有待焉者郡守葛子木有志於公者也乃增置規  
緒繚以周垣奉公之木主於中而以名請夫公去淮八  
十餘年而今子太夫與父老與子弟邈乎聲容之不相

及也乃油油然而思之思不足又乞祠之有遺愛哉於  
是乎命之曰遺愛祠

海上平寇記

王慎中

守備汀漳俞君志輔被服進趨退然儒生也瞻視在鞞  
帑之間言若不能出口溫慈款慤望之知其有仁義之  
容然而旂鼓鳴於側矢石交乎前疾雷飄風迅急而倏  
忽大之有勝敗之數而小之有死生之形士皆掉魂搖  
魄前却而阻喪君顧意喜色壯張揚矜厲重英之矛七



注之甲鷲鳥舉而虢虎怒殺人如麻目睫曾不為之一瞬是何其猛厲孔武也是時漳州海寇張甚有司以為憂督府檄君捕之君構兵不數百航海索賊旬日遇焉與戰海上敗之獲六十艘俘八十餘人其自投於水者稱是賊行海上數十年無此衄矣由有此海所為開寨置帥以彈制非常者費鉅而員多然提兵逐賊成數十年未有之捷乃獨在君而君又非有責於海者也亦可謂難矣予觀昔之善為將而能多取勝者皆用素治之

兵訓練齊而約束明非徒其志意信而已其耳目亦且習於旗旄之色而揮之使進退則不亂熟於鐘鼓之節而奏之使作止則不惑又當有以豐給而厚享之椎牛擊豕醢酒成池饜其口腹之所取資遂氣閒而思自決於一聞以為效如馬飽於捭嘶鳴騰沓而欲奮然後可用君所提數百之兵率召募新集形貌不相識寧獨訓練不夙約束不豫而已其於服屬之分猶未明也君又窮空家無餘財所為市牛酒買梁粟以恣士之所嗜不

能具也徒以一身率先士卒共食糗糒觸犯炎風衝冒  
巨浪日或不再食以與賊格而竟以取勝君誠何術而  
得人之易致效之速如此予知之矣用未早教之兵而  
能盡其力者以義氣作之而已用未厚養之兵而能鼓  
其勇者以誠心結之而已余方欲以是問君而玄鍾所  
千戶某等來乞文勒君之伐輒書此以與之君其毋以  
予為儒者而好揣言兵意云君之功在瀕海數郡而玄  
鍾所獨欲書之者君所獲賊在玄鍾境內其調發舟兵

諸費多出其境而君靖廉不擾以故其人尤德之爾君名大猷志輔其子以武舉推用為令官

宣城令姜公去思記

湯顯祖

余識宣城令荆人姜君奇方孝廉時長者後余遊宣行水陽林樹修遠厨傳甚飭已又見其人士沈君典梅禹金之流文雅風流為之忻然令數來攸攸如也令朝京師會余上試令故江陵相弟子師也不數日江陵弟子介令候余余謝不敢當意令且計最寵遴之矣然令終

用平徙得治粟郎已復貶山東小州屬監泰山妃祠余  
異之蓋去宣十年丞武林而病疽宣人間之愁然趨比  
已宣人間之脫然喜余又異焉夫姜君者亦蹇諤重進  
止質行人耳治縣當亦無有奇何以思乎一日宣父老  
諸生來言狀如之且曰令無以予民然善為條如前役  
者長常署人田多者得收其旁戶租常自入豪蕩比前  
徵後相補射為謾卒發覺一人至負租百萬犯至死當  
戍邊者至一家九人連年不決遣令至乃與囚約能輒

抵所負為除不能遣未盡十日囚空更為法行條編均里甲里自徵輸因以訖稅如程至無可答故事吏贖常利金得自與間行其十之三游聲不在民矣緩急無所勾令曰若此所謂金生而粟死者也歲當稂奈何乃大治諸庾累穀至七萬餘石主以訾良人然令在縣六年無凶災後乃連歲水敗穀種流死然後以此不饑嗟夫作令如此亦可思矣余歎曰然則何以遷無殊則諸生瞠然造前曰沈君典在時言之矣雖江陵相亦極知姜

令賢然嘗謂其子令不與我親常衆見我後江陵相橫不肯持父喪問荆人士在都者當云我何聞獨姜有後言因以忤去且夫仕宦遇合者時也惠音者基也其時在上其基在下然則何以去十年而後思中一父老般仙飲洩而前曰始令之勤吾宣也食糲衣薦亡晝夜忽忽勉循其民問勞疾苦興立纖致口咄咄不能言常心計而手條之乃至顏色黎露耳目將廢一時掾吏姍笑為愚然至今號令有所利便民者常君之法也乃今而

後知之余不覺流聲歎曰若宣之民可謂能言其君矣  
百姓何負於長吏哉書之告後來者



文章辨體彙選卷五百六十五

欽定四庫全書

文章辨體彙選卷五百六十六

明 賀復徵 編

記七

以下官署

臨湍縣令廳壁記 唐李華

鄧為天下局闔兩都南蔽秦漢以來多封將相姻戚故  
其人益豪強內全邑曰南陽曰穰曰臨湍蓋古新城也  
穰州府所理吏不暇息南陽領戶既寡奸俠所歸惟臨

湍境清人閑從仕者所樂開元裂此鄉三千戶為菊潭  
縣天寶至德之間北騎南侵南陽為戰地地荒人散千  
里無烟猶以郵置之衝往復王命權置官吏招集疲人  
如寒資裘如餒併食聖朝臨下有赫哀撫兆人誅元凶  
清天下詔方鎮選良吏平昌孟威一作或字承顏自左驍  
衛兵曹叅軍本道節度使表為此縣始至戶不盈百為  
政七月盡室而歸者千餘家難矣哉古之為政者先諸  
人後諸身先其人則人不勞後其身則身自逸承顏勤

恤老幼而休息之損有餘補不足而煦育之人論其心  
則不勞而理矣古之求士者觀諸其家乃知為政承顏  
奉版輿冒邊塵北越鞏洛歸家於漢上又以清白之祿  
為甘旨之資臣子之道卓然則其餘可知也令長品秩  
章綬人皆知之故不書今所書議能也寶應七年七月  
甲辰記

道州刺史廳壁記

元結

天下太平方千里之內生植齒類刺史能存亡休戚之

天下兵興方千里之內能保黎庶能攘患難在刺史耳  
凡刺史若無文武才畧若不清廉肅下若不明惠公直  
則一州生類皆受其害於戲自至此州見井邑丘墟生  
民幾盡試問其故不覺涕下前後刺史或有貪猥懦弱  
不分是非但以衣服飲食為事數年之間蒼生蒙以私  
欲侵奪無之公家驅迫非姦惡強富殆無存者問之耆  
老前後刺史能恤養貧弱惠守法令有徐公履道李公  
廉而已徧問諸公善或不及徐李二公惡有不堪說者

故為此記與刺史作戒自置州以來諸公改授進紉年月則舊記存焉

江州刺史廳壁記

獨孤及

古者國有史氏君舉必書倚相董狐史鮑史嚚即其人也秦以來國化為郡史官廢職策牘之制寢滅記事者但用名氏歲月書於公堂而春秋禱祀存乎屋壁其來舊矣是州也在荆之域於潯之陽江從岷山東注潯澥洪濤至是派分為九而廬山湓水周乎雉堞洞庭彭蠡

為之襟帶故自晉元康訖於梁陳出入五代四百餘載  
世稱雄鎮且曰天府匪親匪賢莫荷其寄唐自有天下  
六合一軌設險斯廢惟民是恤則命官擇任與列郡等  
矣至德以來戎馬生而楚氛惡猶以是邦咽喉秦吳跨  
躡荆徐而提封萬井岐路五裂每使臣計郡縣之財入  
調軍府之儲峙璽節旁午羽書絡繹走閩蜀而馳於越  
必出此路而防虞供應功倍他郡故亦大其任而難其  
人今年春渤海封公繼踐厥位夫為政猶工之攻木也

得於手應於心則盤曲擁腫迎刃而解况美材乎故公  
以發矸之利導勝殘之俗布政三月而人從又每歎曰  
茫茫舊壤千載在目觀乎版築則灌嬰之業廓而存焉  
披乎圖牒則溫太真庾元規之車塵若可窺焉義寧以  
來百四十有九載纂斯位者風聲相聆軌躅相躡前賢  
後賢纍纍如貫珠善惡成敗我之元龜酌而行之吾師  
存焉於是徵諸故老鳩其名氏之存者凡若干人踳而  
書之以為九江都國誌



藍田縣丞廳壁記 韓愈

丞之職所以貳令於一邑無所不當問其下主簿尉主簿尉乃有分職丞位高而偪例以嫌不可否事文書行吏抱成案詣丞卷其前鉗以左手右手摘紙尾鴈鶩行以進平立睨丞曰當署丞涉筆占位署惟謹目吏問可不可吏曰得則退不敢畧省漫不知何事官雖尊力勢反出主簿尉下諺數謾必曰丞至以相訾警丞之設豈端使然哉博陵崔斯立種學績文以蓄其有泓涵演迤日大以

肆貞元初挾其能戰藝於京師再進再屈於人元和初  
以前大理寺評事言得失黜官再轉而為丞茲邑始至  
喟曰官無卑顧材不足塞職既噤不得施用又喟曰丞  
哉丞哉余不負丞而丞負余則盡拚去牙角一躡故跡  
破崖岸而為之丞廳故有記壞漏汚不可讀斯立易桶  
與瓦墁治壁悉書前任人名氏庭有老槐四行南墻巨  
竹千挺儼立若相持水泔泔循除鳴斯立痛掃溉對樹  
二松日哦其間有問者輒對曰余方有公事子姑去考

功郎中知制誥韓愈記

河南府同官記韓愈

永貞元年愈自陽山移江陵法曹參軍獲事河東公公  
嘗與其從事言建中初天子始紀年更元命官司舉貞  
觀開元之烈羣臣惕慄奉職命材登良不敢私違當時  
自齒朝之士而上以及下百執事官闕一人將補必取  
其良然而河南同時於天下稱多獨得將相五人故於  
府之參軍則得我公於河南主簿則得故相國范陽盧

公於汜水主簿則得故相國今太子賓客滎陽鄭公於  
陸渾主簿則得相國今吏部侍郎天水趙公於登封主  
簿則得故吏部尚書東都留守吳郡顧公盧公去河南  
為右補闕其後由尚書左丞至宰相鄭公去汜水為監  
察御史佐山南軍其後由工部侍郎至宰相罷而又為  
趙公去陸渾為右拾遺其後由給事中為宰相顧公去  
登封為監察御史其後由京兆尹至吏部尚書東都留  
守我公去府為長水尉其後由膳部郎中為荆南節度

行軍司馬遂為節度使自工部尚書至吏部尚書三相國之勞在史冊顧吏部慎職小心於時有聲我公愿潔而沉密開亮而卓偉行茂於宗事修於官嗣紹家烈不違其先作帥南荆厥間休顯武志既揚文教亦熙登槐贊元其慶且至故好語故事者以為五公之始迹也同其後進而偕大也亦同其稱名臣也又同官職雖分而功德有鉅細其有忠勞於國家也同有若將同其後而先同其初也有聞而問者於是焉書既五年始立石刻

其語河南府參軍舍庭中於時河東公為左僕射宰相  
出藩大邦開府漢南鄭公以工部尚書留守東都趙公  
以吏部尚書鎮江陵漢南地連七州戎士十萬其官宰相  
也留守之官居禁省中歲時出旌旗序留司文武百官  
於宮城門外而衙之江陵故楚都也戎士五萬三公同  
時千里相望可謂盛矣河東公名均姓裴氏

監祭使壁記

柳宗元

禮檀弓曰祭禮與其敬不足而禮有餘也不若禮不足

而敬有餘也是必禮與敬皆足而後祭之義行焉周禮祭僕視祭祀有司百官之戒具誅其不敬者漢以侍御史監祠唐開元禮凡大祠若干中祠若干咸以御史監視祠官有不如儀者以聞其刻印移書則曰監祭使寶應中尤異其禮更號祠祭使俄復其初又制凡供祠之吏雖當齋戒得以決罰由是禮與敬無不足者聖人之於祭祀非必神之也蓋亦附之教焉事於天地示有尊也不肅則無以教敬事於宗廟示廣孝也不肅則無以

教愛事於有功烈者示報德也不肅則無以勸善凡肅之道自法制始奉法守制由御史出者也故將有事焉則祠部上其目吏部上其官奉制書以來告然後頒於有司以謹百事太常修其禮光祿合其物百工之役先一日咸至於祠而考閱焉御史會公卿有司執簡而臨之故其粢盛牲牢酒醴菜果之饌必實於庖厨鐘鼓笙竽琴瑟戛擊之樂篳篥綴兆之數必具於庭內樽彝壘洗俎豆醢筭之器必挈於壇堂之上奉奠之士贊禮之



童樂工舞師洎執役而衛者咸引數其實設簠扑於堂下以修官刑而羣吏莫敢不備物羅奏牘於几上以嚴天憲而衆官莫敢不盡誠而祭之日先升立於西階之上以待卒事其禮之周旋樂之節奏必周知之退而視其燔燎瘞埋終之以敬也居常則飭四方祀貢之物以時登於王府服器之脩具祠宇之繕理牛羊毛滌之節三宮御廩之寔畢備而聽命焉舊以監祭御史之長居是職貞元九年十二月御史多缺予班在三人之下進

而領焉明年中山劉禹錫始復舊制由禮與敬以臨其人而官事益理制令有不宜於時者必復於上革而正之於是始為記求簿書得為是職者若干人書焉

四門助教廳壁記

柳宗元

周之置虞庠於四郊以養國老教胄子祭統曰天子設四學蓋其制也易傳太初篇曰天子旦入東學晝入南學夕入西學暮入北學蔡邕引之以定明堂之位焉大戴禮保傳篇曰帝入東學以貴仁入南學以貴信入西

學以貴德入北學以貴爵賈生述之以明太子之教焉  
故曰為大教之宮而四學具焉參明堂之政原大教之  
極其建置之道宏也後魏太和中立學於四門置助教  
二十人隋氏始隸於國子而降置五人皇朝始合於太  
學又省至三人員位彌簡其官尤難非儒之通者不列  
也四門學之制掌國之上士中士下士凡三等侯伯子  
男凡四等其子孫之為胄子者及庶士庶人之子為俊  
士者使執其業而居其次就師儒之官而攷正焉助教

之職佐博士以掌鼓篋夏楚之政令令分其人而教育之其有通經力學者必於歲之杪升於禮部聽簡試焉課生徒之進退必酌於中道非博雅莊敬之流固不得臨於是故有去而升於朝者賀秘書由是為博士歸散騎由是為左拾遺舊制以拾遺為八品清官故必以名實者居於其位貞元中王化既成經籍少間有司命太學之官頗以為易專名譽好文章者咸恥為學官至是河東柳立始以前進士求署茲職天水武儒衡闕中歐

陽詹又繼之是歲為四門助教凡三人皆文士京師以  
為異余與立同祖於方興公與武公同升於禮部與歐  
陽同志於文四門助教署未嘗紀前人名氏余故為之  
紀而由夫三子者始

嶺南節度饗軍堂記

柳宗元

唐制嶺南為五府府部州以十數其大小之戎號令之  
用則聽於節度使焉其外大海多蠻夷由流求訶陵西  
抵大夏康居環水而國以百數則統於押蕃船使焉內

之幅負萬里以執秩拱稽時聽教命外之羈屬數萬里以譯言摯寶歲帥貢職合二使之重以治於廣州故賓軍之事宜無與較大且賓有牲牢饗餼嘉樂好禮以同遠合䟽軍有犒饋宴饗勞旅勤歸以羣力一心於是治也閑閤階序不可與他邦類必厚棟大梁夷庭高門然後可以上充於揖讓下周於步武今御史扶風公廉廣州且專二使增德以來遠人申威以修戎政大饗宴合樂從其豐盈先是為堂於治城西北陬其位公北向

五  
百  
六  
十  
衆賓南向奏部伎於其西視泉地於其東隅與庠仄庭  
廡下漏日未及晡則赫炎當日汗眩更起而禮莫克終  
故凡大宴饗大軍旅則寓於外壘儀形不稱公於是始  
新其制為堂南面橫八楹縱十楹嚮之宴位化為東序  
西又如之其外更衣之次膳食之宇列觀以遊目偶亭  
以展聽彌望極顧莫究其徃泉池之舊增濬益植以暇  
以息如在林壑問工焉取則師輿是供問役焉取則蠻  
隸是徵問材焉取則隙宇是遷或益其闕伐山浮海農

賈拱手張目視具乃十月甲子克成公命饗於新堂幢  
牙茸纛金節析羽旌旗旗旒咸飾於下鼓以鼗晉金以  
鐸饒公與監軍使肅上賓延羣僚將校士吏咸次於位  
弁裳芻衣胡夷蜚蠻睢盱就列者十人以上銅鼎體節  
燔魚載炙羽鱗狸互之物沉泛醞盎之齊均飫於卒士  
興王之舞服夷之伎楔擊吹鼓之音飛騰幻怪之容環  
觀於遠邇禮成樂遍以叙而賀且曰是邦臨護之大五  
人合之非是堂之制不可以備物非我公之德不可以



容衆曠於往初肇自今茲大和有人以觀遠方古之戎  
政其曷用加此華元名大夫也殺羊而御者不及霍去  
病良將軍也餘肉而士有饑色猶克稱能以垂到今矧  
茲具美其道不廢願勒於金石以永示後祀遂相與來  
告且乞辭某讓不獲乃刻於茲石

道州刺史廳後記

呂溫

壁記非古也若冠綬命秩之差則有格令在山川風物  
之辨則有圖諫在所以為之記者豈不欲述理道列賢

不肖以訓於後庶中人以上得化其心焉代之作者率異於是或誇學名數或務政為文居官而自記者則媚已不居其官而代人記者則媚人春秋之旨蓋委地矣賢二千石河南元結字次山自作道州刺史廳記既彰善而不黨亦指惡而不誣直舉胸臆用為鑒戒昭昭吏師長在屋壁後之貪虐放肆以生人為戲者獨不愧於心乎予自幼時讀古循吏傳慕其為人以為士大夫立名於代無以高此前年冬由尚書刑部郎中出為此州

雖履劇自課而未能逮其意也往刺史有許子良者輒移元次山記於北牖下而以其文代之後亦時有號君子之清者蒞此熟視焉而莫之改豈是其難乎予也魯安知乎他即命巧而書之俾復其舊且為後記以廣次山之志云

掌書記廳壁記

李德裕

續漢書百官志稱三公及大將軍皆有記室主上表章報書記雖列於上宰之庭然本為從軍之職故揚雄稱

軍旅之際飛書馳檄用枚臯非夫天機殊健學源濬發  
含思而九流委輸揮毫而萬象駿奔如庖丁提刃為之  
滿志師文鼓瑟效不可窮則不能稱是職也昔安豐侯  
竇融徵還京師光武問曰所上表章誰與參之融曰皆  
從事班彪所為及竇憲貴寵班固傳毅之徒皆置之戎  
幕以典文章憲邸文章之盛冠於當代魏氏以陳琳阮  
瑀管記室自東漢以後文才高名之士未有不由於是  
選其簡才之用亦金馬石渠之亞况河東精甲十萬

提封千里半雜胡騎遙制邊朔惟師旅之威容為列藩  
之儀表典茲羽檄代有英髦間者吳少微富嘉謨王翰  
孫逖咸有制作存於是邦其所不知蓋闕如也暨太尉  
臨淮王總節制之師德裕叔父嘗典斯職尋以才識英  
妙肅宗召拜監察御史厥後僕射高貞公今河陽節度  
令狐公以人文掌宸翰國子司業鄭公給事河南尹杜  
公以才華登貴仕繼斯躅者不亦盛歟丙申歲丞相高  
平公始自樞衡以膺總帥以右拾遺杜君為主記明主

惜其忠規復拜舊職尋參內廷視草之列次用殿中侍御史崔君德裕獲接崔君之後文學空虛才術莫追繼親塵於吾祖挹芬烈於前賢先是廡廊之下有豐碑紀其名氏而不書職業今再刊斯記於本署西垣以高平公統戎為始元和十四年四月十一日記

華州新葺設廳記

沈亞之

今天下邦郡之望莫與太華等然而公堂譙臺無別位顧几硯與餽樂之具日更廢置於其間寧地勢之要為

守者無久留於其任而經慮莫及此乎隴西公為守未滿歲郡中既治因窺其庶屋可改者乃先問其吏曰政之為困何始也吏曰累更其守耳公曰吏知其病哉夫几硯者公事之重器也以宴而遷撤宴而復則屈不得常屢更其所政之為困不由此耶且吏入公門望其居則必莊是几硯之處宜其嚴也今朝撤而暮置事之者既勞固以慢矣而况酒行樂作婦女列坐優者與詼諧搖笑左右侍立或銜哂壞容不可罪也夫狎久則失敬

豈吾之獨患其吏亦醜之明日解冗宇一構於正寢西南隅塹其外數出土基之飾故材以換用圯者磨其淄弱者承其輕濬流於其所以便塗者補棟續楹不涉旬而功就沼沚之媚隨而比矣嗟乎轉疣為安不費而功吾知其由人長慶元年四月甲子吳興沈亞之仰公之迹因請張文其下紀其功焉

蓋屋縣丞廳壁記

沈亞之

蓋屋道巴漢三蜀南極山不盡三十里北阻渭短長之



補與南而近其野半為澤麓故鼠倚牆而居雖善捕伐不能無傷於稼說者以為漢武帝嘗夜出射熊於是而田人輒留執帝從者由是觀之民情阻狠古為難理時猶逼畏指諫即稍罷然佞臣竟以帝恥不忘遂藉民人田為五柞長楊矣今又徙甄越卒留戍邑中神策亦屯兵角居俱稱護甸而三蜀移民遊手其間市閭雜業者多於縣人十九趨農桑業者十五又有太子家田及作園皆募其傭藝之由是富民豪農頗輸名買橫緩急以

自蔽匿民冒名欺偷浮詐相樛雖賢宰處之而丞與曹或不類亦不能盡枉直之情也夫丞之職也贊宰之政以條諸曹其有不便於民者丞能得不可今丞也余從祖居之既滿歲民諍不作如此則宰之所宰丞之所贊可謂知方也已長慶初余思相如進諫之風南歷長楊至於射熊五柞訪其遺迹因退舍是邑遂志論山川俗里之事題於丞之署云

河中府參軍廳記

沈亞之

國朝設官無高卑皆以職授任不職而居任者獨參軍  
焉觀其意蓋欲以清人賢胄之子弟將命試任使以雅  
地任之耳不然何優然曠養之如此其差高下則以五  
府六雄為之次第蒲河中界三京左雍三百里且以天  
子在雍故其地益雄調吏者必以其人授焉噫今之衆  
官多失職不失其本者獨參軍焉長慶二年予客蒲河  
中府參軍某參軍某族世皆清胄又與始命之意不失  
矣乃相與請予記職官之本於其署

御史臺新造中書院記

舒元興

王者執生殺之柄造天下使百度順而已矣其或不順  
與順而不得其度者皆屬於御史府府之動靜為朝廷  
紀綱之職與百司絕類蓋百司坐其署但專局而已矣  
入於朝與啓事於丞相府亦不出乎其位是以朝罷而  
各復其司以無事於朝堂與中書也若御史臺每朝會  
其長總領屬官謁於天子道路誰何之聲達於禁扉至  
含元殿西廡使朱衣從官傳呼促百官就班遲曉文武

臣僚列於兩觀之下使監察御史二人立於東西朝廷  
輒道以監之雞人報點監者押百官由通乾觀象入宣  
政門及班於殿廷前則左右巡使二人分押於鐘鼓樓  
下若兩班就食於廊下則又分殿中侍御史一人為之  
使以蒞之內謁者承旨喚仗入東西閣門裁冠曳組者  
皆趨而進分監察御史一人立於紫宸屏下以監其出  
入爐烟起天子負斧扆聽政自螭首龍墀南屬於文武  
班則侍御史一人盡得專彈舉不如法者由是五府之

屬得入殿內其職益繁其風益峻故大臣由公相而下  
皆屏氣竊息注萬目於吾曹吾曹坐南臺則綜覈天下  
之法立內朝則糾繩千官之失百官有滯凝之事皆就  
我而質故乘輿所在下馬成府釐朝廷之綱目與坐臺  
之判決者相半是以御史府故事於中書之南當有理  
所先時唯中丞得專寓於尚舍一院若雜事與左右巡  
使則寓於西省小胥之廡下遇大朝會時吾屬皆來則  
分憇於雜事巡使之地既寓於小胥則我寔客也每亡

事而去則主人必空而入誼譁狼藉其態萬變向之霜  
稜盡為涕洟矣豈吾君以天下綱紀屬之於我意耶上  
元二年侍御史劉孺之作直廳記初拜儀云謝宰相訖  
向南入直省院侯端長又入中書儀云到直省院入門  
揖端公訖各就房嗚呼以御史之貴重而前時作者之  
記恬然以直省院為記君子未嘗有非之者神羊之神  
何其翳而不光耶聖唐大和三年己酉歲天子擢尚書  
吏部郎中河南宇文公為御史中丞詔下之日不仁者

相弔御史府新例知雜事一人中丞得以選於廷臣河南公既拜之日上言請尚書司勳郎中瑯琊王君以自輔識者曰河南瑯琊同心異質之人也心苟同雖堅金可斷於御史乎何有他日雜事累以寓直省院為歎廼議於中丞中丞深樂之即時啓於中丞曰此前日之闕也中丞能革之豈直柏署之光乎寔羽衛五府之多也皆佐其意事得聞於上上曰良有是乎俞其請如響應即詔度支出錢百萬以資焉廼以政事堂南直阡之南



選地以作之中書之南寔天下會計之地不容咫尺之隙非雄重清切之司於此豈容足乎我是以得規制為之焉舊中丞院在西與西院相絕遂以其地易大京兆院合三院為一東西四十六步南北四十步由東為首其一為中丞其二為雜事其三為左右巡使若中丞升為大夫改官不改院若三院畢朝集臺院附於雜事殿察附於巡使其名總號為御史臺中書南院院門北闕以取其嚮朝廷也其製自中書南廊架南北為軒入院

門分東西廂為拜揖折旋之地內外皆有廡蟠回詰曲  
矚之盈盈然梁棟甚宏柱石甚偉椽櫨索稅麗而不華  
門牕戶牖華而不侈名木修篁新姿如舊若升綠雲若  
編青簫以至於几案筆硯簾幌茵榻果籩茗器皆新作  
也從官胥士役夫馬走勾稽案牘飲食休息之地皆得  
其所若百官之請事羣吏之來謁入吾門將祇伺於屏  
者見吾軒堂階闥之嚴固不俟戒而自肅焉為此者何  
尊天子也吾府為天子耳目宸居堂陛未有耳目聰明

堂陞峻整而天子不尊也天子尊未有姦臣賊子而不滅也  
姦臣賊子盡滅矣可以自朝廷至於海隅蕩蕩焉何所不  
理哉吾之作豈是志小者近者之心耶謹按高祖大皇  
帝作大明宮將二百年矣當時有司經度曾不是思將  
以待我而作我之所以作蓋前補二百年之遺事後貽  
千萬年之不朽縉紳觀者命為御史北臺間者謂之知  
言君子曰移中丞雜事今之心於大柄天下豈有遺事  
哉某備於寮屬得聞君子之論且承公命其記於是乎

書仍題中丞雜事洎三院至主簿官封名氏於其後以  
為一時之盛事大和四年歲次庚戌八月十六日丁巳  
記



文章辨體彙選卷五百六十六

欽定四庫全書

集部

文章辨體彙選卷五百

六十七至  
七十

詳校官中書<sub>臣</sub>李 采

主事銜<sub>臣</sub>徐以坤覆勘

總校官檢討<sub>臣</sub>何思鈞

校對官中書<sub>臣</sub>吳 俊

謄錄監生<sub>臣</sub>黃廷璧

欽定四庫全書

文章辨體彙選卷五百六十七

明 賀復徵 編

記八

諫院題名記

宋謝馬光

古者諫無官自公卿大夫至於工商無不得諫者漢興以來始置官夫以天下之政四海之衆得失利病萃於一官使言之其為任亦重矣居是官者當志其大捨其

細先其急後其緩專利國家而不為身謀彼汲汲於名者猶汲汲於利也其間相去何遠哉天禧初真宗詔置諫官六員責以職事慶厯中錢君始書其名於版光恐久而漫滅嘉祐八年刻著於石後之人將厯指其名而議之曰某也忠某也詐某也直某也曲嗚呼可不懼哉

洪州新建縣廳壁記

曾鞏

為後世之吏得行其志者少矣此仕之所以難也而縣為最甚何哉凡縣之政無大小令主簿皆獨任而民事



委曲當有所操縱緩急不能一斷以法舉法而繩之則其罪固易求也凡有所為問可不可於州執一而違之則其勢固易撓也其罪易求其勢易撓故為之者有以得於州然後其濟可幾也不幸其一錙銖與之拂則大者求其罪小者撓其勢將不遺其力矣吏之不能自安豈足道哉縣有不與其擾者乎方是時也而天下之能忘其勢而好惡不妄者鮮矣能忘人之勢而強立不苟者亦鮮矣州負其強以取威縣憂其弱以求免其習已

久其俗已成之後而守正循理以求其得於州其亦不  
可以必也則仕於此者欲行其志豈非難也哉君子者  
雖無所處而不安然其於自處也未嘗不擇仕而得擇  
其自處則縣之事有不敢任者豈可謂過也哉洪州新  
建自太平興國六年分南昌為縣至嘉祐三年凡若干  
年為令者凡三十有九人而秘書省著作佐郎黃巽公  
權來為其令抑豪縱惠下窮守正循理而得濟其志者  
也公權亦喜其職之行因考次凡為令者名氏將伐石

以書而列置於壁間故予為之載其行治而因著其為  
縣之難使來者得覽焉

重修御史臺記

曾鞏

元祐三年新作御史臺成詔臣鞏為之記臣惟御史見  
於周掌贊書受法令而已戰國以對執法亦記事之職  
也至秦漢始置大夫位亞丞相副曰中丞督部刺史受  
公卿奏事舉劾按章其屬有侍御史出討姦猾治大獄  
於是專繩糾之任厥後政事歸尚書而御史與尚書謁

者並為三臺大夫更為三公而中丞為臺率與尚書令  
司隸校尉朝會皆專席為三獨坐隋唐復置大夫天下  
有冤而無告者得與中書門下省詰之謂之三司自是  
御史益為雄俊其屬則有殿中監察并侍御史為三院  
侍御史一人知雜事橫榻而坐謂之南床皆專彈劾不  
言事本朝因之至真宗皇帝增置言事御史其後皆得  
言事大則御史相率廷辯小則人得自達故其任視前  
世為尤重列聖相繼皆假以寬仁使得自竭是以風采

所加百僚震肅朝廷倚而益尊初本朝雖因唐制然以大夫為兼官不治臺事以郎中員外郎兼侍御史知雜事以貳中丞以太常博士以上為三院未至者則為御史裏行監察故事內監尚書六曹外巡按郡縣久之亦廢至神宗皇帝大正官名始歸大夫職以侍御史治雜事罷御史裏行而復六察官分守既定廼相官府蓋御史臺建於宣化坊自開寶五年纔有東西獄七年雷德驤分判三院事請於上而大之屋不及百楹天禧二年

復詔增廣遂至三百六十楹訖於元豐垂七十年浸以  
圯壞神宗皇帝俾圖程工以授有司舊闕大夫聽事踵  
鄴都制度闕門北鄉取陰殺之義又形勢庳下無以重  
威至是命置大夫聽事闕門東鄉增庳為崇培下為高  
其規模宏遠矣今上即政務先慈儉土木之勤咸詔勿  
事惟臺之建寔遵先訓猶以大夫虛員姑省營築闕門  
北嚮仍故不改經度損益斷自聖心以元祐三年六月  
己亥始事三年八月庚辰卒功用人力十萬五千為屋

三百五十一楹門闔眈眈堂室渠渠長貳佐屬視事燕  
休翼翼申申各適所宜吏舍囚圉深靚嚴固案牘簿書  
棲列有序所以觀示都邑表正憲度揆諸典章於是為  
稱昔周人考室見於風雅魯國作門記諸春秋後世傳  
誦為載籍首恭惟神宗皇帝受命承序十有九年建立  
經常皆應古義好惡無私賞罰不僭而綱紀是張宮室  
弗營池籞苟完而府寺是崇故能垂情風憲之司以啟  
後嗣之意二聖恭已開闢言路聰無不聞明無不燭士

有以言獲福不聞忠以取禍耳目之地寵遇莫抗故能  
新是棟宇以成前人之志是宜著在文字刻之金石以  
度越周魯垂休無窮顧臣之愚何足以稱明詔之萬一  
哉雖然臣嘗聞之責人非難責己惟難御史責人者也  
將相大臣非其人百官有司失其職天下之有敗法亂  
紀服讒即慝者御史皆得以責之然則御史獨無責乎  
哉居其位有所不知知之有所不言言之有所不行行  
之而君子病焉小人幸焉此御史之責也御史雖不自



責天下得以責之惟其不難於責已則施於責人能稱其任矣能稱其任然後危冠盛服崇墉峻宇游焉息焉可以無媿苟異於是得毋餒於中哉臣故不自揆輒因承詔誦其所聞以告在位者使有以仰承列聖褒大崇顯之意焉

國子學同官記

明 蘓元衡

乙巳秋詔即應天府學為國子學設師弟子員其博士助教正錄非有德望遽於經學者不得登用維時博士

則今上親擢金華許君存仁為之丙午春以章貢劉君宗弼為博士臨安李君宗表河南張君用周濟寧潘君文秀為助教高昌完君彥明為學正廣信鄭君一中金陵杜君叔循為學錄臨江張君以誠為典膳其夏用周除淮安衛叅謀其秋彥明除建平知縣以誠除管瀆場管勾其冬一中除上海縣丞繼用周則廣平郭君可久繼彥明則南昌李君克正繼以誠則章貢呂君仲善繼一中則東陽張君孟兼而余以七月叅授學錄丁未秋

學陞正四品始設祭酒司業典簿員即拜存仁祭酒宗  
弼司業錢塘陳彥博由元翰林編修署典簿浚儀陳君  
子方由元進士署博士棣州高君仲暉由太子伴讀署  
助教而余亦忝進學正補余處則吳興張君伯淵也其  
後存仁謫韶州宗弼拜浙江按察僉事子方拜江西按  
察僉事彥博遷太常博士宗表以事罷去叔循遷太常  
贊禮仲暉陞磨勘司令伯淵陞磨勘司丞仲善陞太常  
典簿孟兼陞祠部主事余轉翰林院國史編脩官辭疾

不上今在官者祭酒則梁先生以太子賓客兼博士則  
汴梁李君叔允典簿則濟南周君中助教則上蔡朱君  
原禮合文秀可久克正為七人而叔允原禮入東宮兼  
伴讀云自余為國子官屬於斯之二十一人者皆獲托  
官聯而與之遊亦一時之幸哉然甫六年而升沈出處  
去就離合不齊已若是況於他日乎此余之所以慨然  
也因為之記歸田後時覽觀其姓氏庶用自慰焉來者  
夷考其平生以議擬其得失亦未必不有取於斯也梁

先生名貞字叔享會稽人劉君名丞亞周君名循理潘  
君名時英郭君名永高君名暉朱君名闕復完君名哲  
鄭君名貫杜君名環其名如其字者許君呂君汴梁李  
君及東陽臨江兩張君名宗義則浚儀陳君名世呂則  
錢塘陳君名濟則河南張君名溥則吳興張君曄者臨  
安李君名也宗頤者南昌李君名也余名伯衡字平仲  
眉山人

文章辨體彙選卷五百六十七

欽定四庫全書

文章辨體彙選卷五百六十八

明 賀復徵 編

記九

古跡

新修滕王閣記

唐韓愈

愈少時側間江南多臨觀之美而滕王閣獨為第一有  
瑰偉絕特之稱及得三王所為序賦記等壯其文詞益  
欲往一觀而讀之以忘吾憂繫官於朝願莫之遂十四

年以言事斥守揭陽便道取疾以至海上又不得過南昌而觀所謂滕王閣者其冬以天子進大號加恩區內移刺袁州袁於南昌為屬邑私喜幸自語以為當得躬詣大府受約束於下執事及其無事且還倘得一至其處竊寄目償所願焉至州之七月詔以中書舍人太原王公為御史中丞觀察江南西道洪江饒虔吉信撫袁悉屬治所八州之人前所不便及所願欲而不得者公至之日皆罷行之大者驛聞小者立變春生秋殺陽開



陰閉令修於庭戶數日之間而人自得於湖山千里之外吾雖欲出意見論利害聽命於幕下而吾州乃無一事可假而行者又安得捨已所事以勤館人則滕王閣又無因而至焉矣其歲九月人吏浹和公與監軍使燕於此閣文武賓士皆與在席酒半合辭而言曰此屋不修且壞前公為從事此邦適理新之公所為文寔書在壁今三十年而公來為邦伯適及期月公又來燕於此公烏得無情哉公應曰諾於是棟楹梁桷板檻之腐黑

撓折者蓋瓦級輒之破缺者赤白之漫漶不鮮者治之  
則已無侈前人無廢後觀工既訖功公以衆飲而以書  
命愈曰子其為我記之愈既以未得造觀為歎竊喜載  
名其上詞列三王之次有榮耀焉乃不辭而承公命其  
江山之好登望之樂雖老矣如獲從公遊尚能為公賦  
之

墨池記 宋曾鞏

臨川之城東有地隱然而高以臨於溪曰新城新城之

上有池渹然而方以長曰王羲之之墨池者荀伯子臨川記云也羲之嘗慕張芝臨池學書池水盡黑此為其故蹟豈信然耶方羲之之不可強以仕而嘗極東方出滄海以娛其意於山水之間豈有徜徉肆恣而又嘗自休於此耶羲之之書晚乃善則其所能蓋亦以精力自致者非天成也然後世未有能及者豈其學不如彼耶則學固豈可以少哉況欲深造道德者耶墨池之上今為州學舍教授王君盛恐其不章也書晉王右軍墨池

之六字於楹間以揭之又告於羣曰願有記惟王君之心豈愛人之善雖一能不以廢而因以及乎其跡耶其亦欲推其事以勉其學者耶夫人之有一能而使後人尚之如此況仁人莊士之遺風餘思被於來世者何如哉

登南樓記

陸游

郡集於南樓在儀門之南石城闕

黃鶴山制度闕

偉登望尤勝鄂州樓觀為多而此獨得江山之要會山

谷所謂江東湖北行畫圖鄂州南樓天下無是也下闕  
南湖荷葉彌望中為橋曰廣平其上皆列肆兩傍有水  
閣極佳往山谷云凭欄十里芰荷香謂南湖也是日早  
微雨晚晴二十八日同章冠之秀才甫登石鏡亭訪黃  
鶴故址石鏡亭者石城山一隅正枕大江其西與漢陽  
相對止隔一水人物草木可數唐沔州治漢陽縣故李  
太白沔州泛城南郎官湖詩序云白遷於夜郎遇故人  
尚書郎張謂出使夏口沔州牧杜公漢陽令王公觴於

江城之南湖其後沔州廢漢陽以縣隸鄂州周世宗平淮南得其地復以為軍太白詩云誰道此水廣狹如一疋練江夏黃鶴樓青山漢陽縣人語猶可聞故人面可見形容最妙漢陽負山帶江其南小山有僧寺者大別山也又有小別謂之二別云黃鶴樓舊傳費闕於

此後忽乘黃鶴來歸故名樓號為天下絕景以崔灝詩最傳而太白奇句得於此者尤多今樓已廢故址亦不復存問老吏云在石鏡亭南樓之間闕鸚鵡洲猶有可

想見其地樓傍李監篆石刻獨存太白登此樓送孟浩  
然詩云孤帆遠映碧山盡惟見長江天際流蓋帆檣映  
遠山尤可觀非江行久不能知也復與冠之出漢陽門  
游仙洞止是石壁數尺皆直裂無洞穴之狀舊傳有仙  
人隱其中嘗啓洞出遊老兵遇之得黃金數餅後化為  
石東坡先生有詩記其事初不云所遇何人且太白固  
已云頗聞列仙人於此學飛術一朝向蓬海千載空石  
室今鄂人謂之呂公洞蓋流俗附會也有道人澶州人

結廬洞側設呂公像其中洞少南即石鏡山麓粗頑石也色黃赤皴駁了不能鑑物可謂浪得名者

文章辨體彙選卷五百六十八



欽定四庫全書

文章辨體彙選卷五百六十九

明 賀復徵 編

記十 以下亭閣

殊亭記 唐元結

癸卯中扶風馬向兼理武昌以明信嚴斷惠正為理故  
政不待時而成於戲若明而不信嚴而不斷惠而不正  
雖欲理身終不自理況於人哉公能令人理始身多暇

招我避暑且為涼亭亭之基址復在

集作出

山上佳水揚

集作本相

蔭常多清風巡迴極望目不厭遠吾見公材殊政

殊跡殊為此亭又殊因命之曰殊亭斷石刻記立于亭側庶幾來者無或倦焉

蘭谿縣靈隱寺東峯新亭記

馮宿

東陽實會稽西部之郡蘭谿實東陽西鄙之邑歲在戊寅天官署洪君少卿以為之宰君之始至則用信待物用勤集事信故人早勤故公濟未暮而其政成後三年

夏六月余過其邑洪君導余以邑之勝賞於是乎有東  
峯亭之遊背城之闔半里而近初屆佛刹利之上方而  
亭在焉松門蓋空石道如帶足倦累息然後造夫極焉  
向之池隍館宇之多旗亭闌闌之喧途道往來之衆簿  
書鞅掌之煩顧步之餘忽焉如失但山風颼颼嶺雲  
我飛軒憑虛洞壑在下向背殊狀昏明易色指遙青而  
點黛者問之則曰某山某巖某林某墅指遠白而曳練  
者問之則曰某洲某渚某湫某塘高深互呈心目相競

飄若象外意其幻成余既諧其私爰究其本先是元微之構遊觀之所洪君曾是挈俸錢二萬經斯營斯因地於山因材於林因工於子來因時於農隙又何易也崇山濬谷佳境勝概縣世伏匿一朝發朗人何能不傳在建中興元之間為江南西道節度曹王所知時方興軍職壓寇境供億倉卒賦平人和王實賴之故御史大夫鄭公滑節度盧公羣與君嘗同寮每號之曰精金百鍊良驥千里誠矣然則是邑之理茲亭之勝於君之分不為

難能夫播芳塵而鼓餘波者非文莫可遂攬筆為記刊於石而附諸地志焉

潭州東池戴氏堂記

知宗元

弘農公刺潭三年因東泉為池環之九里丘陵林麓距其涯坻島洲渚交其中其岸之突而出者水縈之若玦焉池之勝于是為最公曰是非離世樂道者不宜有此卒授賓客之選者譙國戴氏曰簡為堂而居之堂成而勝益奇望之若連轡縻艦與波上下就之顛倒萬物遼

廓眇忽樹之松栢杉櫨被之菱芡芙蕖鬱然而陰榮然  
而榮凡觀望浮游之美專於戴氏矣戴氏嘗以文行累  
為連率所賓禮貢之澤宮而志不願仕與人交取其退  
讓受諸侯之寵不以自大其離世與好孔氏書旁具莊  
丈莫不總統以至虛為極得受益之道其樂道歟賢者  
之舉也必以類當弘農公之選而專茲地之勝豈易而  
得哉地雖勝得人焉而居之則山若增而高水若闢而  
廣堂不待飾而已矣戴氏以泉池為宅居以雲物為

朋徒摠幽發粹日與之娛則行宜益高文宜益峻道宜  
益懋交相贊者也既碩其內又揚于時吾懼其離世之  
志不果矣君子謂弘農公刺潭得其政為東池得其勝  
授之得其人豈非動而時中者歟於戴氏堂也見公之  
德不可以不記

永州萬石亭記

柳宗元

御史中丞清河男崔公來莅永州間日登城北牖臨于  
荒野藜翳之隙見怪石特出度其下必有殊勝步自西

門以求其墟伐竹披輿歌仄以入綿谷跨谿皆大石林  
立渙若奔雲錯若置碁怒者虎鬪企者鳥厲抉其穴則  
鼻口相呀搜其根則蹄股交峙環行卒愕疑若搏噬於  
是剗闢朽壤剪焚榛蕪決澮溝導伏流散為疎林洄為  
清池寥廓泓渟若造物者始判清濁効奇於茲地非人  
力也乃立游亭以宅厥中直亭之西石若披分可以眺  
望其上青壁斗絕沈于淵源莫究其極自下而望則合  
乎攢巒與山無窮明日州邑耆老雜然而至曰吾儕生



是州孰是野眉尾齒鯢未嘗知此豈天墜地出設茲神  
物以彰我公之德歟既賀而請名公曰是石之數不可  
知也以其多而命之曰萬石亭耆老又言曰懿夫公之  
名亭也豈專狀物而已哉公嘗六為二千石既盈其數  
然而有道之士咸恨推公之嘉績未洽於人敢頌休聲  
祝公于明神漢之三公秩號萬石我公之德宜受茲錫  
漢有禮臣惟萬石君我公之化始于閨門道合于古祐  
之自天野夫獻辭公壽萬年宗元嘗以牋奏隸尚書敢

專筆削以附零陵故事時元和十年正月五日記

桂州訾家洲亭記

柳宗元

大凡以觀游名於代者不過視於一方其或傍達左右則以為特異至若不驚遠不陵危環山洄江四出如一夸奇競秀咸不相讓徧行天下者唯是得之桂州多靈山發地峭堅林立四野署之左曰灘水水之中曰訾氏之洲凡嶠南之山川達于海上於是畢出而古今莫能知元和十二年御史中丞裴公來蒞茲邦都督二十七

州諸軍州事盜遁姦革德惠敷施朞年政成而當天子  
平淮夷定河朔告于諸侯公既施慶于下乃合僚吏登  
茲以嬉觀望攸長悼前之遺於是厚貨居毗移于間壤  
伐惡木剝輿草前指後畫心舒目行忽焉若飄浮上騰  
以臨雲氣萬山面內重江束隘聯嵐含輝旋視其宜常  
所未覩倏然互見以為飛舞奔走與遊者偕來乃經工  
化材考極相方南為燕亭延宇垂阿步簷更衣周若一  
舍北有崇軒以臨千里左浮飛閣右列間館比舟為梁

與波昇降芭離山含龍宮昔之所大蓄在亭內日出扶桑雲飛蒼梧海霞島霧來助游物其隙則抗月檻於迴谿出風榭於篁中晝極其美又益以夜列星下布潁氣迴合遽然萬變若與安期羨門接於物外則凡名觀游於天下者有不屈伏退讓以推高是亭者乎既成以燕歡極而賀咸曰昔之遺勝槩者必於深山窮谷人罕能至而好事者後得以為己功未有直治城挾闌闌車與步騎朝過夕視訖千百年莫或異顧一旦得之遂出於

他邦雖博物辨口莫能舉其上者然則人之心目其果有遼絕特殊而不可至者耶蓋非挂山之靈不足以瓌觀非是洲之曠不足以極視非公之鑒不能以獨得噫造物者之設是久矣而盡之於今余其可以無籍乎

柳州東亭記

柳宗元

出州南譙門左行二十六步有棄地在道南南值江西際垂楊傳置東曰東館其內草木猥興有崖谷傾亞缺圯豕得以為囿地得以為藪人莫能居至是始命披制

蠲疎樹以竹箭松檉挂檜栢杉易為堂亭峭為杠梁下  
上徊翔前出兩翼馮空拒江江化為湖衆山橫環嶠閣  
嚮灣當邑居之劇而忘乎人間斯亦奇矣乃取館之北  
宇右闢之以為夕室取傳置之東宇左闢之以為朝室  
又北闢之以為陰室作屋于北牖下以為陽室作斯亭  
于中以為中室朝室以夕居之夕室以朝居之中室日  
中而居之陰室以違溫風焉陽室以違淒風焉若無寒  
暑也則朝夕復其號既成作石于中室書以告之後人

庶勿壞元和十二年九月某日柳宗元記

潁亭記 陳寬

潁水濱有地可以覽山川之秀者九山祠在焉西北餘  
予升之見潁水直北劈地而來砉如隙光端如匣劍視  
若中面使人毛磔又見太室與大隗等列領羣峯而來  
崢屹不得進蹭蹬卻倚三十六嶠若立指焉而近北左  
手煙雲草樹濃淡覆露各盡其態平視之令人意遠超  
超然若萬里之鶴也予曰可樹亭哉遂召匠氏授以程

度匠氏曰諾退而有言曰假吾令不德主未聞惠人未  
蒙仁止其幾而遽以庥覽為懷乎予聞之甚羞而以為  
不聞也夫陽翟自潁陽達許昌皆漢郡潁川屬是乃吾  
土也予不肖假長於此雖獲戾於人而不避者吾將識  
其來乎及成會邑中彥髦以落之中宴客有舉爵而稱  
曰吾斯山河之秀可與峴首爭請名之潁亭遂名之若  
使解攜手值良辰嘉賓二三聲酒緩進既揖既枋對之  
益酣因書石以介其壁俾覽者懲之當敏樹政無敏樹



亭以釣匠民之意也唐大中庚午歲三月九日丁亥攝  
陽翟縣令陳寬記

廬山草堂記

白居易

匡廬奇秀甲天下山山北峯曰香爐峯北寺曰遺愛寺  
介峯寺間其境勝絕又甲廬山元和十一年秋太原人  
白樂天見而愛之若遠行客過故鄉戀戀不能去因面  
峯腋寺作為草堂明年春草堂成三間兩柱二室四牖  
廣袤豐殺一稱心力洞北戶來陰風防徂暑也敞南甍

納陽日虞初寒也木斲而已不加丹牆圻而已不加白  
碱皆用石罽牕用紙竹簾紵幃率稱是焉堂中設木榻  
四素屏二漆琴一張儒道佛書各兩三卷樂天既來為  
主仰觀山俯聽泉旁晚竹樹雲石自辰及酉應接不暇  
俄而物誘氣隨外適內和一宿體寧再宿心恬三宿後  
頽然嗒然不知其然而然自問其故答曰是居也前有  
平地輪廣十丈中有平臺半平地臺南有方池倍平臺  
環池多山林野卉池中生白蓮白魚又南抵石澗夾澗

有古松老杉大僅以人圍高不知幾百尺修柯曳雲低  
枝拂潭如幢豎如蓋張如龍蛇走松下多灌叢蘿蔦葉  
蔓駢織承翳日月光不到地盛夏風氣如八九月時下  
鋪白石為出入道堂北五步據層崖積石嵌空埤塊雜  
木異草蓋覆其上綠陰蒙蒙朱實離離不識其名四時  
一色又有飛泉植茗就以烹燂好事者見可以永日堂  
東有瀑布水懸三尺瀉階隅落石渠昏曉如練色夜中  
如環珮琴筑聲堂西倚北崖右趾以剖竹架空引崖上

泉脈分綫懸自簷注砌累累如貫珠霏微如雨露滴瀝  
飄灑隨風遠去其四旁耳目杖屨可及者春有錦繡谷  
花夏有石門澗雲秋有虎谿月冬有鑪峯雪陰晴顯晦  
昏旦含吐千變萬狀不可殫紀覲縷而言故云甲廬山  
者噫凡人豐一屋華一簣而起居其間尚不免有驕穩  
之態今我為是物主物至致知各以類至又安得不外  
適內和體寧心恬哉昔永遠宗雷輩十八人同入此山  
老死不返去我千載我知其心以是哉矧余自思從幼

迨老若白屋若朱門凡所止雖一日二日聊覆簣土為  
臺聚拳石為山環斗水為池其喜山水病僻如此一旦  
蹇剥來佐江郡郡守以優容撫我廬山以靈勝待我是  
天與我時地與我所卒獲所好又何求焉尚以冗員所  
羈餘累未盡或往或來未遑寧處待余異日弟妹婚嫁  
畢司馬歲秩滿出處行止得以自遂則必左手引妻子  
右手抱琴書終老於斯以成就我平生之志清泉白石  
實聞此言時三月二十七日始居新堂四月九日與河

南元集虛范陽張允中南陽張深之東西二林長老湊  
朗滿晦堅等凡十有二人具齋施茶果以樂之因為草  
堂記

泠泉亭記

白居易

東南山水餘杭郡為最就郡言靈隱寺為尤由寺觀泠  
泉亭為甲亭在山水中央寺西南隅高不倍尋廣不  
累丈而最奇得要地搜勝概物無遁形春之日吾愛其  
草薰薰木欣欣可以導和納粹暢人血氣夏之夜吾愛

其泉淙淙風冷冷可以蠲煩折醒起人心情山樹為蓋  
巖石為屏雲從棟生水與階平坐而翫之者可濯足於  
床下卧而狎之者可垂釣於枕上矧又潺湲潔澈粹冷  
柔滑若俗士若道人眼耳之塵心舌之垢不待盥滌見  
輒除去潛利陰益可勝言哉斯所以最餘杭而甲靈隱  
也杭自郡城抵四周叢山複湖易為形勝先是領郡者  
有相里君造虛白亭有韓僕射臯作侯仙亭有裴庶子  
棠棣作觀風亭有盧給事元輔作見山亭及右司郎中

河南元與最後作此亭於是五亭相望如指之列可謂  
佳境殫矣能事畢矣後來者雖有敏心巧目無所加焉  
故吾繼之述而不作長慶三年八月十三日記

文章辨體彙選卷五百六十九